

六祖大師法寶壇經

六祖大師法寶壇經

10316
0342

妙理卽是人心人未能以心合理解釋必須文字脫文字全憑意見須知妙理中原無意見意見未化卽是執着諸大乘所演妙法一落執着之心盡成法相六祖承佛教正宗開輓近愚迷言法處脫文字離意見惟以見性爲宗所以破衆生執著之病誠度世之金針歟世人業重往往慕效修禪最易爲害修空莫向空處求破有自然歸空修定莫向定中沉解動自然得定修淨莫向淨中覓隨染自然生淨日用尋常之間

一切貪憂狹劣念起處隨時伺察去切已之實
病漸得開明悟得最初本心卽是見性法門是
知借經文以悟理實所以破吾心之惑若於紙
上覓法起心修証全是執著之心徒勞無益然
則末劫衆生惟賴六祖壇經開一線之覺路乎
諸佛心傳歸宗六祖久覓真蹟竟不可得是
經於京都舊書坊中得之係宋時郎簡所集
官本楷書甚工字跡間有剝落之處彷彿書
之前後皆依原本謄錄一字不敢增減竊以

入道真訣賴茲不泯學人悟此可以發明心
地因梓送以廣流傳云

六祖大師法寶記序

宋吏部侍郎 郎簡述

按唐書曰後魏之末有僧號達磨者本天竺國王之子以護國出家入南海得禪宗妙法自釋迦文佛相傳有衣鉢爲記以世相付受達磨賁衣鉢航海而來至梁詣武帝帝問以有爲之事達磨不說乃之魏隱於嵩山少林寺以其法傳慧可可傳僧粲粲傳道信信傳弘忍忍傳慧能而復出神秀能於達磨在中國爲六世故天下

謂之六祖法寶記蓋六祖之所說其法也其法
乃生靈之大本人焉鬼神焉萬物焉遂與其清
明廣大者紛然而大異六祖憫此乃諭人欲人
自求之卽其心而返道也然天下之言性命者
多矣若其言之之至詳理之之至當推之之至
悉而釋氏得之矣若其示之之至直趨之之至
徑證之之至親而六祖之於釋氏又其得之也
六祖於釋氏教道可謂要乎至哉今天子開善
閣記謂以本性證乎了義者未有捨六祖之道

而有能至於此者也是則六祖者乃三界之慈
父諸佛之善嗣歟偉乎惟至聖而能知至道也
然六祖之說余素敬之患其爲俗所增損而文
字鄙俚繁襍殆不可考會沙門契嵩作壇經贊
因謂嵩師曰若能正之吾爲出財模印以廣其
傳更二載嵩果得曹谿古本校之勒成三卷粲
然皆六祖之言不復謬妄乃命工鏤板以集其
勝事至和三年三月十九日序

六祖大師法寶壇經略序

門人 法海 等集

大師名慧能。姓盧氏。父行瑫。母李氏。誕師於唐
貞觀十二年戊戌二月八日子時。時毫光騰空。
異香滿室。黎明有二異僧造謁。謂師之父曰。夜
來生兒。專爲安名。可上慧下能也。父曰。何名慧
能。僧曰。慧者。以法慧施衆生。能者。能作佛事。言
訖而出。不知所之。師不飲乳。遇夜神人灌以甘
露。旣長年二十有四。聞經悟道。往黃梅求印可。

五祖器之。付衣法。令嗣祖位。時龍朔元年辛酉
歲也。南歸隱遯一十六年。至儀鳳元年丙子正
月八日。會印宗法師。宗悟契師旨。是月十五日。
普會四衆。爲師薙髮。二月八日。集諸名德授具
足戒。西京智光律師爲授戒師。蘇州慧靜律師
爲羯磨。荊州通應律師爲教授。中天耆多羅律
師爲說戒。西國蜜多三藏爲證戒。其戒壇乃宋
朝求那跋陀羅三藏勅建立。碑曰。後當有肉身
菩薩於此受戒。又梁天監元年智藥三藏自西

竺國航海而來。將彼土菩提樹一株植此壇畔。亦預誌曰。後一百七十年有肉身菩薩於此樹下開演上乘。度無量衆。眞傳佛心印之法主也。師至是祝髮受戒。及與四衆開示單傳之法旨。一如昔識。次年春。師辭衆歸寶林。印宗與緇白送者千餘人。直至曹谿。時荊州通應律師與學者數百人依師而住。師至曹谿寶林觀堂。宇湫隘。不足容衆。欲廣之。遂謁里人陳亞仙曰。老僧欲就檀越求坐具地。得不。仙曰。和尚坐具幾許。

闊祖出坐具示之。亞仙唯然。祖以坐具一展。盡
罩曹谿四境。四天王現身坐鎮四方。今寺境有
天王嶺。因茲而名。仙曰。知和尚法力廣大。但吾
高祖墳墓並在此地。他日造塔。幸望存留。餘願
盡捨。永爲寶坊。然此地乃生龍白象來脉。只可
平天。不可平地。寺後營建。一依其言。師遊境內。
山水勝處輒憩止。遂成蘭若一十三所。茲寶林
道場亦先是西國智藥三藏。自南海經曹溪口。
掬水而飲。香美異之。謂其徒曰。此水與西天之

水無別。溪源上必有勝地。堪爲蘭若。隨流至源上。四顧山水回環。峰巒奇秀。嘆曰。宛如西天寶林山也。乃謂曹侯村居民曰。可於此山建一梵刹。一百七十年後。當有無上法寶於此。演化得道者如林。宜號寶林。時韶州牧侯敬中。以其言具表聞奏上。可其請。賜寶林爲額。遂成梵宮。落成於梁天監三年。寺殿前有潭一所。龍常出沒其間。觸撓林木。一日現形甚巨。波浪洶涌。雲霧陰翳。徒衆皆懼。師叱之曰。你只能現大身。不能

現小身。若爲神龍。當能變化。以小現大。以大現小也。其龍忽沒。俄頃復現小身。躍出潭面。師展鉢試之曰。你且不敢入。老僧鉢盂裏。龍乃游揚至前。師以鉢旨之。龍不能動。師持鉢堂上。與龍說法。龍遂脫骨而去。其骨長可七寸。首尾角足皆具。留傳寺門。師後以土石堙其潭。今殿前左側有鐵塔鎮處是也。龍骨至己卯兵罹寺火因失未知所之。

師墜腰石鐫龍朔元年盧居士誌八字此石今存黃梅東禪又唐王維右丞爲神會大師

作祖師記云師混勞侶積十六載會印宗講
經因爲削髮又柳宗元刺史作祖師謚號碑
云師受信具遁隱南海上十六年度其可行
乃居曹谿爲人師又宋張商英丞相作五祖
記云五祖演法於黃梅縣之東禪院蓋其便
於將母龍朔元年以衣法付六祖已散衆入
東山結菴有居人馮茂以山施師爲道場焉
以此考之則師至黃梅傳受五祖衣法實龍
朔元年辛酉歲至儀鳳丙子得十六年師方

至法性祝髮他本或作師咸亨中至黃梅者
非

梁天監元年壬午至唐儀鳳元年丙子得一
百七十五年應智藥三藏預誌云

六祖大師法寶壇經

門人 法海 等集

悟法傳衣第一

時大師至寶林。韶州刺史韋璠。與官僚入山。請師於大梵寺講堂。爲衆開緣。說摩訶般若波羅蜜法。師升座。次刺史官僚三十餘人。儒宗學士三十餘人。僧尼道俗一千餘人。同時作禮。願聞法要。大師告曰。善知識。總淨心念摩訶般若波羅蜜。大師良久。復告衆曰。善知識。菩提自性本

來清淨。但用此心直了成佛。善知識。且聽慧能行由得法事意。能嚴父本貫范陽。左降流于嶺南。作新州百姓。此身不幸。父又早亡。老母孤遺。移來南海。艱辛貧乏。於市賣柴。時有一客買柴。使令送至客店。客收去。能得錢。却出門外。見一客誦經。能一聞經云。應無所住而生其心。心卽開悟。遂問客誦何經。客曰。金剛經。復問從何所來。持此經典。客云。我從蘄州黃梅縣東禪寺來。其寺是五祖忍大師在彼主化。門人一千有餘。